

四庫全書

子部

欽定四庫全書

子部

雲笈七籤卷一百四十五

詳校官監察御史_臣邱庭澍

檢討_臣何思鈞覆勘

總校官庶吉士_臣倉聖脉

校對官庶吉士_臣潘庭筠

謄錄監生_臣胡金芝

欽定四庫全書

雲笈七籤卷一百四

宋張君房撰

傳

玄洲上卿蘇君傳周季通集

先師姓蘇諱林字子玄濮陽曲水人也少稟異操獨逸
無倫訪真之志與日彌篤常負擔至趙師琴高先生時
年二十一受鍊氣益命之道琴高初為周康王門下舍
人以內行補精術及丹法能水游飛行時已九百歲惟

不死而已飛仙也後乘赤鯉入水或出入人間而林託
景丹霄志不終此後改師華山仙人仇先生仇先生者
湯王時木匠也服胎食之法還神守魂之事大得其益
先生曰子真人也當學真道我迹不足躡矣乃致林於
涓子涓子者真人也既見之遂授以真訣告林曰欲作
地上真人必先服食藥物除去三尸殺滅穀蟲三尸者
一名青姑伐人眼是故目暗面皺口臭齒落由是青姑
之氣穿鑿泥丸也二名白姑伐人五臟是故心毫氣少

喜忘荒悶由白姑貫穿六府之液也三名血尸伐人胃
管是故腸輪煩滿骨枯肉焦志意不開所思不固失食
則饑悲愁感歎精誠昏怠神爽襍錯由血尸流噬鬼胎
之關也若不去三尸而服藥者穀食雖斷蟲猶不死也
徒絕五味雖勤吐納亦無益者蓋其蟲生而求人不死
不可得也是故服食不辟於死生由青姑白姑血尸三
鬼不去所致爾雖復斷穀人體重滯奄奄淡悶又所夢
非真顛倒翻錯邪淫不除由蟲在內搖動五神故也凡

欲求真當先服制蟲丸制蟲丸者一名初神去本丸也
欲作真人當先服制仙丸制仙丸者太上八瓊飛精之
丹也夫求長生不死仙真之初固不先服制蟲丸以除
尸蟲建長生之根矣若人腹中有蟲寧得仙乎形中饒
鬼安得真乎其蟲凶惡速人之死故當除之消子後告
林曰我被帝召上補中黃四司大夫領北海公去世無
復日也後林詣消子寢靜之室得書一幅以遺林也其
文曰五斗三一太帝所祕精思二十年三一相見授子

書矣但有三一長生不滅況復守之乎能存三一名刊
玉札況與三一相見乎加存洞房為上清公加知三元
為五帝君後聖金闕帝君所以乘景迅雷周行十天實
由洞房三元真一之道吾餌木精三百年服氣五百年
精思六百年守三一三百年守洞房六百年守玄丹五
百年中間復周遊名山看望八海迴翔五嶽休息洞室
樂林草之垂條與鳥獸之相激川瀆吐精丘陵鬱鬱萬
物之秀寒暑之節弋釣長流遨遊玄瀨靜心山岫念真

養氣呼召六丁玉女見衛展轉六合無所羈束守形思真
二千八百餘年寔樂中仙不求聞達今卒被召上補天
位徘徊世澤惆悵絕氣吾其去矣請從此別子勤勛之
相望颯室也林省書流涕徬徨拜空涓師之迹於是絕
迹矣夫玄丹者泥丸之神也其法出太上素靈訣守三
一為地真守洞房為真人守玄丹為太微官也林謹奉
法術施行道成周觀天下遊睠名山分形散影寢息丹
陵賣履市巷醜形試真得意而栖遯化不倫時人莫能

識也以漢元帝神爵二年三月六日告季通曰我昨被
玄洲召為真命上卿領太極中侯大夫與汝別比明旦
有雲車羽蓋驂龍駕虎侍從數千人迎林即日登天冉
冉西北而去良久雲氣覆之遂絕林未去之時先是太
極遣使者下拜為中嶽真人後又太上遣玉郎下拜為
五嶽地真人宮在丹陵予見先師得道為仙已三被拜
授而乃登昇蓋洪德高妙玄韻宿感靈化虛源神澄八
方龍昇鳳逐飛步真門隱顯津梁觀試風塵其道神矣

其法珍矣非紙札麤意所能述宣今聊撰本師之標略
爾將來有道之士以遊目也

太和真人傳

元陽子附

太和真人尹軌字公度太原人也乃文始先生之從弟
少學天文兼通讖緯來事先生因教服黃精花及授諸
道經凡百餘篇皆蒙口訣先生登真之後即與隱士杜
冲等同於先生宅修學時年二十八絕粒行氣專修上
法太上哀之賜任太和真人仍下統仙寮於杜陽宮時

復出遊帶神丹十餘箇周歷天下濟護有緣或鍊金銀
以賑貧窮或行丹藥以救危厄求哀之人咸得其福利
焉或上朝玉京校一切行業善惡報應宿命之期或論
天地日月星辰運度賒促之分或遊宴諸天參校神仙
圖籙品位部御之方或論童真始仙威儀俯仰之格或
臨諸地領察兆人建功立行齋請之福或監度學道男
女經方藥餌之道或遊百山千川檢閱神司鬼神考錄罪
福之目或論風雨雷電水旱豐儉之事焉吾所遊行或

為道士或為儒生或為童愚或為長老不可以一塗限也或與羣真衆仙驂龍馭鳳策空駕虛雲馳電邁出有入無分形散影處處遊集或巡五嶽之洞適十洲之宮出八荒之域入九幽之府或酌碧海之津挹玄邱之雲採丹華於閬苑掇絳實於玉圃故上清瓊文帝章曰太和真人與太華真人三天長生君南極總司禁君西臺中侯北帝中真九靈王子太靈仙妃赤精王童玄谷先生南嶽赤松子中山王喬紫陽真人西城王君中黃先

生趙伯玄山仲宗等同修行三真寶經上法皆面發金容項負圓光乘虛登霄遊宴紫庭變化萬方適意翱翔嘯命立到徵召萬靈攝制羣魔決斷生死駕霄乘煙出入帝庭焉

元陽子者仙人也生於北極之端育於虛無之中與天地浮沈隨日月周迴被服自然含剛懷柔優游乎太漠之外跼蹐乎中嶽之上觀和氣之布施察萬物之經紀覽緯度之差序圖盛衰之終始乃遇老君哀愍元陽遺

經一卷名曰黃庭乃太素之始元陰陽之至道分理之
真要養神之訣文上古之人行得其真中古以來不得
其要傳授謬誤亦從來久也本黃老作此經令學者皆
得神仙然黃老已來英儒之士多為注解不得黃老之
本旨失其要說於是元陽憮然退思採黃老之妙識粗
為其注不能究盡道意深遠至通猶可為學之徒使微
悟之爾有得黃庭經者老子也史記或云黃者黃帝老
者老子今亦謂太上經為正也

太極真人傳

太極真人杜冲字玄逸鎬京人也以周昭王丁巳年聞
文始先生登真乃於茲靈宅棲玄學道于時幽人逸士
自遠而來者有五人焉並沈默虛遠方雅高素道術相
忘共弘不伐之則也後穆王聞之為修觀建祠置冲為
道士焉將以氣均巢許德為物範故天子禮之而不臣
諸侯敬之而不爵蓋以其弘修道業故也冲間居幽室
吟咏道德常攝護氣液吐納光華經二十餘載幽感真

人展先生降於寢靜侍者二人捧碧玉函立於左右沖
乃拜首求哀蒙授九華丹方一函謂沖曰老君與尹先
生於東海八滄山召太帝集羣真天下山川洞室仙人
不遠而至時有地司保舉子之勤勞老君勅我付爾仙
經也沖依按合服而身生玉映五臟堅潤裁容氣息又
感真人李君授以太上素靈洞玄大有妙經沖復修之
甚得其驗遂乃解胞釋結保命凝真領攝羣神洞觀衆
妙焉穆王親崇道教以祈神仙共策遺風之駿日馳千

里中到崑崙山昇玄圃之宮西詣龜山謁王母於青琳之室東遊碧海展敬丈人採若木之華北適玄壘南邁長離同挹絳山之髓驅策虎豹役使百靈通冥達幽莫測其涯年一百二十餘以懿王己亥歲上清元君遣仙官下迎授書為太極真人下任王屋山仙王矣

太清真人傳

太清真人宋倫字德玄洛陽人也以厲王甲辰歲入道於是凝心寢景抱一沖和不交人事日誦五千文數遍

服黃精白朮積二十餘年乃密感老君項負圓明面放
金光披九色離羅之帔建七映暉晨之冠有仙童六人
負真執籙倫匍匐乞哀乃告倫曰吾有景中之道通真
之經生乎三元之始出乎九玄之庭五德合慶六氣凝
精分真散景保遐固齡子能修之立致雲輶出有入無
徹幽洞冥三光並耀二氣齊靈變化適意飛昇上清倫
拜授之乃開蘊出靈飛六甲素奏丹符以付於倫倫得
經修之乃自然通感常有玉童六人更遞侍之察物如

神言無不驗能望巖中步凌波涉險不由津路或化為
麋鹿或託作鳩鵲翱翔原陸試人之心年九十餘以景
王時受書為太清真人下司中嶽神仙之錄焉

論曰按樓觀仙師傳及樓觀本記並云昔周康王聞尹
先生有神仙大度之志乃拜為大夫并賜嘉名因號此
宅為樓觀焉次昭王時大夫遇老君因遂得道其次穆
王乃欽尚遺塵為建祠修觀召幽逸之人置為道士自
爾相承于今不絕故樓觀碑云樓觀者昔周康王大夫

關令尹喜所立也以其結草為樓因即為號又云周穆王西遊秦文東獵並枉駕迴輪親崇道教始皇建廟於樓南漢武立宮於觀北晉宋謁板于今尚存秦漢廟戶相繼不絕由是論之乃驗老君西度關在於昭王之時信矣或云幽厲平敬之時西度者此由後人不見老君本紀妄為穿鑿者也幽王時孔子時有見老君者斯並化胡之後復還中夏幽演之時也或云老君西出散關者按張天師述老君本紀云老子幽演訖乃與文始先

生遊此赤城上虞山過女几雞頭天柱太白山秦昭襄
王聞之於西麓下為修城邑今散關中其故墟猶在是
也謂曾於此過乃昇於崑崙山故此舊墟尚稱尹喜城
老停驛等名爾以此詳之則癸丑年復非度此散關明
矣或云史記無文事同虛妄者至如九天九壘川源土
俗徧於六合猶有不書況其一區一第輒能備載焉若
編以史為實錄者則天下譜牒圖書識緯經論並為虛
誕豈獨此一觀一傳而已哉蓋驗之在實其來久矣周

宣王時郊聞採薪之人行歌曰巾金巾入天門呼長精
歛玄泉鳴天鼓養泥丸時人莫能知之惟老君曰此活
國中人其語祕矣斯皆修習無上正真之道也

太元真人東嶽上卿司命真君傳

弟子中候仙人李道字安林撰

真人姓茅諱盈字叔申咸陽南關人也姬胄分根氏族
於茅積德累仁祚流百世誕縱明賢繼踵相承高祖父
諱濛字初成深識玄遠察覽興亡知周之衰不仕諸侯

乃師於北郭北阿鬼谷先生遂隱遁華山盤桓靈峰逍
遙幽岫靜念神仙高抗蕭寥絕塵人間也盈曾祖父諱
偃字泰闕濛之第四子也仕秦昭王之世位為舍人稍
遷車騎校尉長平恭侯毗弼霸正有功業於時焉盈祖
父諱嘉字正倫仕秦莊王為廣信侯始皇即位嘉輔帝
室當莊襄王時也秦地漸以并巴蜀漢內宛郢置南郡
矣北收上郡以東為河東太原上黨東至滎陽并一周
置三川郡以呂不韋為丞相號文信侯以嘉為德信侯

使招置賓客游士欲并天下始皇六年韓魏趙衛楚共
擊秦取壽陵始皇使嘉將兵攻之有功焉衛迫東都嘉
又尅討皆平之始皇壯嘉志節賜金五千斤二十五年
秦大興兵使嘉攻燕遼東得燕王而還又遣嘉定荆江
南地皆降是年置會稽郡嘉將兵於會稽而亡始皇哀
其忠因以相國禮葬之於長安龍首山西南嘉有六子
並知名於時始皇皆官爵承先並各賜姓其第六子諱
祚字彥英不仕不學志願農巷即盈之父也祚有三子

長子諱盈字叔申次子諱固字季偉小子諱衷字思和
盈少秉異操天才穎爍矯志蕭抗行邁遠逸不營聞達
不交非類獨味清虛恬心玄漠盈時年十八遂棄家委
親入于恒山讀老子道德經及周易傳採取山朮而餌
服之潛景絕崖素挺靈岫仰希標玄與世永違始皇三
十年九月庚子盈高祖父濛於華山之中乘雲駕龍白
日升天先是時其邑謠曰神仙得者茅初成駕龍上昇
入太清時下玄洲戲赤城繼世而往在我盈帝若學之

臘嘉平始皇聞謠歌而問其故父老具對曰此仙人之謠勸帝求長生之事於是始皇忻然乃有尋仙之志因改臘曰嘉平盈於恒山積六年思念至道誠感密應寢興妙論通于神夢髣髴見太玄玉女把玉札而攜之曰西城有王君得真道可為君師子奚不尋而受教乎心豁靈暢啟徒內爽覺悟流光之騰曄自謂已得之於千載矣明辰植暉東盼霄邁登嶺陟峻徑到西城齋戒三月沐浴向望遂超榛冒險稽首靈域卒見王君後二十

年從王君西至龜山見王母盈乃叩頭再拜自陳於王
母曰盈小醜賤生枯骨之餘敢以不肖之軀而慕龍鳳
之年欲以朝菌之質竊求積朔之期雖仰遠流莫以知
濟津塗堅塞所要無寄常恐一旦死於鑽放之難取笑
於世俗之夫是以昔日負笈幽林貪師所生遂遇王君
哀盈丹苦見授治身之要服氣之法於是靜齋深室造
行其事師重見告以盈身非玉石而無主於恒氣非四
時常生於內正當率御出入呼吸中適和液得修形神

靡錯感應思積則魂魄不滯理合其分氣甄其適乃可
形精不枯宅不可廢也若使精神疲於往反津液勞於
出入則形當日凋神亦枯落歲減其始月虧其昔矣宜
便妙訪求其長易之益西王母曰子心至矣吾昔先師
元始天皇及皇天扶桑太帝君見遺以要言汝願聞之
邪於是口告盈以玉珮金璫之道太極玄真之經盈拜
受所言稽首而立又告盈曰夫金璫者上清之華蓋陰
景之內真玉珮者太上之隱玄洞飛之寶章得其道者

皆上陟霄霞登遨太極寢晏高空游行紫虛也向說元
始天皇太帝君言是太霄二景隱書玉珮金璫之文章
也又有陰陽二景內真符與本文相隨太上法惟令授
諸司命子玉札玄挺錄字刊金黃映內躍素書上清似
當為上卿之君司命之任矣此道後別當付於子也然
不先聞明堂玄真之道亦無由得太霄隱書也盈於是
辭師乃歸帶索混俗亦不矯於世自說入恒山北谷學
儒俗之業時年四十九也盈父母尚存父見大怒為子

不孝不親供養尋逐妖妄流走四方吾當喻汝為不生
之子也欲杖罰之盈長跪謝曰盈受命應當得道道法
世事兩不相濟雖遠遠供養無旦夕之益能使門內平
安父母老壽盈已受聖師符籙見營助者以天丁之兵
見侍衛者以仙童玉女今道已成不可打擊忠三官考
察非小故也父外信禮度未該內修道德玄域意有未
釋故驗盈情狀俾衆不惑於是操杖向盈適欲舉杖杖
即摧折成數十段段段皆飛揚如弓矢之發中壁壁穿中

柱柱陷父悟不凡瞋意乃止盈曰向所啟正慮如此邂逅中人則有所傷故耳至漢宣帝時二弟俱貴袁為五官大夫西河太守固為執金吾並當之官鄉里相送者數百人時盈亦在座謂賓曰吾雖不作二千石亦有仙靈之職矣來年四月三日當之官能如今日之集會不衆許之至期日盈門前數頃地忽自平治無復寸芥皆青縑幄屋屋下鋪數重白氈容數百人坐遠近翕赫相語來者塞道客乃有數倍於送弟時衆賓並集爾乃大

作主人不見使人但見金槃玉杯自至人前奇餚異果
不可名字酒又美好又有妓樂絲竹金石聲動天地香
麝之芳達于數里飲食隨益六百餘人莫不醉飽明日
迎官來至文官則朱衣素帶數百人武官則甲兵牙旗
器械曜日盈與家人及親族辭訣而語宗室子弟曰夫
真仙道隱貴在跡翳不應表光曲飾動耀視聽吾所以
不得默遁藏景潛舉空同者蓋欲以此道誘勸二弟之
追慕也亦何但固衷之返迷耶天下有心者盡當注向

神仙之冀獲爾言訖遂歸句曲邦人因改句曲為茅君之山時二弟在官聞盈玄跡眇邁白日神仙乘飛步虛越波淩津靈官奉從著於民口節蓋旌旗光耀天下始乃信仙化可學神靈可致然後明松喬不虛鼎湖實有於是並各棄官還家以日昃之年方修盈糟粕遺事不得口訣未為補益乃相與共歎而相謂曰家兄得道非他人也胡不往從親稟問密訣而留此按云云方書以規度世乎縱往而不達兄之神仙終不使吾等死於非

所也遂共棄家扶輿自載以尋斯舉以漢元帝永光五年三月六日渡江求兄於東山遂與相見悲忻流涕告二弟曰悟何晚矣二弟跪曰固衷頑下不達道德願賜長生濟弟元元盈曰卿已老矣欲難可補復縱得真訣適可成地上仙耳其上清昇霄大術非老夫所學今且當漸階其易行以自支住於是並教二弟服青牙始生咽氣液之道以住血斷補焦枯攝筋骨之益亦停年不死之法也因以長齋三年授以上道使存明堂玄真之

氣以攝運生精理和魂神三年之內竭誠精思神光乃見於是六丁奉侍天兵衛護盈又各賜九轉還丹一劑并神方一首各拜而服之仙道成矣後授紫素之書各百字以付固衷固衷拜受其時亦有執儀者以啟正之紫素文曰太上有命天載真書言咸陽茅固家于南關厥字季偉受名當仙位為定錄兼統地真使保舉有道年命相關勤恭所莅四極法令宮館洞臺治丹陽句曲之山固其昃之動靜察聞又曰盈固弟衷挺業該清雖

晚反正思徹徹誠斷馘六天才頽標明今屈司三官保
命建名總括岱宗領死記生位為地仙九宮之英勸教
童蒙開道方成教訓女官授諸妙靈莅治百鬼典崇校
精開察水源江海流傾封掌金谷藏錄玉漿監植龍芝
洞草夜光治于良常之山帶北洞之口鎮陰宮之門也
使者授書訖而去至漢平帝元壽二年八月己酉五帝
各乘方面色車從羣官來下受太帝之命授盈為司命
東卿上真君文以紫玉為板黃金刻之其文曰惟盈虛

挺遠朗幽眈妙玄爰自童蒙散髮北山靜心林澤積思
求神登峻履谷艱尋師門擲形絕嶢投軀萬津丹誠率
往肆其天然遂造明匠乃授靈篇剪髮祝脆殘首截身
帶索自樂不恥飢寒所適惟道所保以真情昭上帝感
激太玄今敬授盈位為太元真人領東嶽上卿司命神
君君平心正格秉操金石丹心矯衆栖神高映故報盈
以玉鉞綠旌八威之策使盈征伐源澤折衝萬神君寒
凍林谷味玄仰真思激窮岫啟心精誠今故報盈以紫

髦之節藕敷華冠使盈招驅萬靈封山召雲君棄家獨
往離親樂仙契闊嶮巖冬袒山川今故報盈繡羽紫帔
丹青飛帟使盈從容霄階攜命玉真君步驟深數足履
危仞心耽志尚曾不愆憚今故報盈以斑龍之輿素虎
之輶使盈浮晏太空飛輪帝庭君披榛併景寒淩霜雪心
求明真不戰不慄今故報盈以曲晨寶蓋瓊幃綠室使
盈遊盼九宮靜神溫密君遠秀遁榮無疲於心潛形幽
嶽靜思萬林今故報盈以流金火鈴雙珠月明可以上

聞太極通音上清君貞心高靜淫累不經素挺浩映內
外坦平今故報盈以錦旌繡幡白羽玄竿可以呼召六
陰玉女侍軒君慈向觸物陰德萬生蠢動之毛皆念經
營今故報盈以鳳鸞之簫金鐘玉磬可以和神虛館樂
真舞靈君飢渴養神艱辛求真萬物不能致其惑干邪
不能毀其淳今故賜盈紫琳之腴玉漿金甕可以壽同
三光刻簡丹瓊也盈標領清玄紫瑋八映心暉重離神
曜太霞實真人之長者故以太元為號君九德既備感

積太微天人虛白不期同歸今酬九事以報往懷盈心神方朗四靈所栖丹神啟煥秉直不迴正任全固監無照微今屈宰上卿總括東嶽又加司命之任以領錄圖籍給玉童玉女各四十人以出入太微受事太極也治宮赤城玉洞之府盈其莅之動靜以聞於是盈與二弟決別而與王君俱去到赤城玉洞之府道次諸山川神靈有司迎啟引者將以千萬矣臨去告二弟曰吾今去矣便有局任不得復數相往來旦夕相見要當一年再

過來於此山三月十八日十二月二日期要吾師及南
嶽太虛赤真人遊盼於二弟之處也將可認識之及有
好道者待吾於是乎吾自當料理之以相教訓未悟于
是季偉思和遂畱治此山洞內立宮結構於外將道著
萬物流潤蒼生德加鳥獸各獲其情神驗禍福罪惡必
明內法既融外教坦平爾乃風雨以時五禾成熟疾癘
不起暴害不行父老謠曰茅山連金陵江湖據下流三
神乘白鵠各治一山頭召雨灌旱稻陸田苗亦柔妻子

咸保室使我無百憂白鵠翔青天何時復來遊

雲笈七籤卷一百四

欽定四庫全書

雲笈七籤卷一百五

宋 張君房 撰

傳

清靈真人裴君傳

清靈真人裴君字玄仁右扶風夏陽人也以漢孝文帝二年君始生焉為人清明顏儀整素善於言笑目有精光垂臂下膝聲氣高徹呼如鐘鳴家奉佛道年十餘歲晝夜不寐精思讀經嘗於四月八日與馮翊趙康子上

黨皓季成共載詣佛圖時天陰雨忽有賤人著故布單衣中黃巾詣君車後索載君禮而問之不答君下車以載之康子季成並大怒呵問何等人而上吾車乎君乃陳諭遂聽俱載君自徒行在後顏無變色寄載人自若亦不以為慙也將至佛圖乃曰吾家近在此乃下車奄然失之佛圖中道人支子元者亦頗知道宿舊人傳之云已年一百七十歲見君而歎曰吾從少至老見人多矣而未嘗見如子者乃延君入曲室之中幽靜之房大

設豐饌飲食既畢將君更移隱處呼之共坐乃謂曰吾
善相人莫如爾者子目中珠子正似北斗瑤光星自背
已下象如河魁既有貴爵又當神仙天下志願子寶享
焉然津梁未啟七氣未淳不見妙事亦無緣而成也因
以所修秘術密以告君道人曰此長生內術世莫得知
吾昔遊焦山及鼈祖之阿遇仙人蔣先生者乃赤將子
輿也以神訣五首授吾奉而行之於今一百七年矣氣
力輕壯不覺衰老但行之不勤多失真志不能去世故

雖延年不得神仙也猶是行之多違精思不至之罪也
今以教子子祕而慎傳之

第一思存五星以體象五靈存之法常於密室以夜半
後生氣之時服挹五方之氣於寢牀上平坐向月建所
在先叩齒九通咽液三十過畢存想五星使北方辰星
在頭上東方歲星在左西方太白星在右南方熒惑星
在脰中間中央鎮星在心中久久行之出入遠行常思
不忘無所不卻萬禍所不能干也後當奄見五老人則

是五星精神也若見者當問以飛仙之道五神共扶人身形白日昇天

第二初以甲子上旬直開除之日為始以生氣之時夜半之後勿以大醉大飽身體不精皆生疾病也當精思遠念於是男女可行長生之道其法要祕非賢勿傳使男女並取生氣含養精血此非外法專採陰益陽也若行之如法則氣液雲行精醴凝和不期老少之皆返童矣凡入靖先須忘形忘物然後叩齒七通而呪曰

白元金精五華敷生中央黃老君和覓攝精皇上太精
凝液骨靈無上太真六氣內纏上精玄老還神補腦使
我合會鍊胎守寶祝畢男子守腎固精煉炁從夾脊遡
上泥丸號曰還元女子守心養神煉火不動以兩乳炁
下腎夾脊上行亦到泥丸號曰化真養之丹扁百日通
靈若久久行之自然成真長生住世不死之道也

第三用五行紫文以除三尸常用朔望之日日中時臨
目南向臨目者當閉而不閉也心存兩目中出青氣心

中出赤氣臍中出黃氣於是三氣相繞合為一氣以貫
一身須臾內外洞徹如火光之狀良久乃叩齒十四通
咽液十四過畢此鍊形之道除尸蟲之法也久而行之
體有五香之氣目明耳聰長生不死

第四名曰陰德致神仙之道其文曰常以甲子日沐浴
竟甲子上旬日當燒香於所止牀之左右久久行之天
仙玉女下降也又一法當養白犬白雞犬名曰白靈雞
名曰白精諸八節日及行入五嶽乃登名山諸有神仙

之所在處密放雞犬於其間去勿迴顧天真仙官當與
子芝英靈草矣又一法作素奏使長一尺二寸丹書其
文曰某郡縣鄉里某欲得長生登仙度世飛行上清真
人至神五嶽羣靈三官九府乞除罪名書奏畢以青絲
條金鑲一雙合以纏奏再拜北向置奏石上因以火燒
成灰乃藏鑲於密石間而去勿反顧無鑲可用條脫一
雙以代鑲古人名為縱容珠子也慎與多口嫉妒之人
道之非但無益乃更致禍如此十過天上五帝三官九

府更相屬勅除人罪過著名生錄刊定仙籍入山求芝
草靈藥所欲皆得山神玉女自來營衛狼虎百害不敢
犯近神靈祐助常欲使人得道開人心意惡鬼老魅不
敢試人行此道易成而無患若道士不知此術入山必
多不利數為鬼物所試在人間則多輻軻疾病財物不
昌所願不從若能行此道長生神仙

第五太極真人常以立春之日日中時會諸仙人於太
極宮刻玉簡記仙名常以其夕夜半時正北向仰視北

極再拜頓首陳乞已罪多少之數求解釋之意畢復再拜乃止至春分之日日中時崑崙瑤臺太素真人會諸仙官校定真經至立夏之日日中時上清五帝會諸仙人於紫微宮見四真人論求道者之功過至夏至之日日中時天上三官會於司命河侯校定萬民罪福增年減算至立秋之日日中時五嶽諸真人詣中央黃老君於黃房雲庭山會仙官於日中定天下神圖靈藥至秋分之日日中時上皇大帝乃登玉清靈闕太微之觀會

太上三老君北極諸真公八海大神五嶽尊靈仙官萬
萬共集議定天下萬兆之罪福學道之勤懈一一條列
副之司命至立冬之日日中時陽臺真人會諸仙官玉
女定新得道始入仙錄之人至冬至之日日中時天真
衆仙諸方諸東華大宮見東海青童君刻定衆仙籍金
書內字常以八節日夜半日中謝七世祖父母及身中
罪過罪過自除也久行之神仙不死夫秋分日者太上
神真觀試萬仙自非真正者不可輕用其日謝罪也真

人仙官以八節日日中時共會集三日乃解欲修道者
當先齋戒勿失之也又一法每至八節日常當行入五
嶽若神仙真人所棲名山之處也每於深僻隱巖之中
密燒香乞願祝曰

玄上九靈太真高神使某長生所欲從心百福如願壽
如靈山謹以節日登巖請生畢因散香於左右勿願而
返常能行此必長生神仙所欲如心玉女詣房衆靈衛
身也若或有棲道冥契而不獲登山者寄心啟願精意

向真亦與身詣名山者無異每事決在心誠密暢求真
堅正乃獲之也此赤將子與五首隱訣內道要事畢矣
君乃再拜而奉要言還歸精思行之常處隱室不逮名
好乃服食茯苓餌卉醴華腴積十一年夜視有光常能
不息從旦至中年二十三本郡所命為功曹君不應命
尋又州辟主簿轉別駕舉秀才詣長安拜博士高第轉
尚書選曹郎御史中丞散騎常侍侍中出為北軍中候
以伐匈奴有功封滌陽侯後遷冀州刺史別駕劉安之

時年四十五初迎君為主簿後轉別駕亦知仙道飲食
黃精積二十餘年身輕面有華光數與君俱齋靜室中
以正月上旬君沐浴齋于靜室至三月庵有仙人乘白
鹿從玉童玉女各七人從天中來下在庭中他人莫之
見君拜頓首乞請一言仙人曰我南嶽真人赤松子也
聞子好道故來相過君何所修行乎君長跪自陳所奉
行凡百二十事松子曰勤存五靈別當授子真道庵然
而去君於是乃求解去官自稱篤疾欲詣太上請命遂

棄官委家逃遊名山尋此微妙別駕劉安之從焉君時
年四十五帝累徵召一不應命逼之不已君乃北遊到
陽峪山以避人間之網羅也遂入石室北洞中學道精
思無所不至安之不能久處山中時復出於人間君於
後將雲子去乃登太華山入西洞玄石室裏積二十二
年奄見五老人皆巾來詣君再拜頓首乞請神訣乃出
神芝見賜一老人巾青巾著青衣拄青杖帶通光陽霞
之符乃東方歲星之大神也以青華之芝見賜出青書

一卷是紫微始青道經也又一老人巾蒼巾著蒼衣柱
蒼杖帶鬱真蕭鳳之符乃北方辰星之大神也以蒼華
之芝見賜出蒼元上籙北斗真經中命四旋經四卷見
授又一老人巾白巾著白衣柱白杖帶皓靈扶希之符
乃西方太白星之大神也以白華之芝見賜出太素玉
籙寶玄真經三卷見授又一老人巾赤巾著赤衣柱赤
杖帶四明朱碧之符乃南方熒惑星之大神也以丹華
之芝見賜出龍胎太和丹經二卷見授又一老人巾黃

巾著黃衣柱黃杖帶中元八維玉門之符乃中央鎮星
之大神也以黃華之芝見賜出四氣上樞太元黃書八
卷見授乃五星之精天之大神也君再拜服此神芝讀
神經十旬之間視見萬里之外能日步千里能隱能彰
役使鬼神乃遊行天下東到青丘遇谷希子青帝君授
以青精日水飲食青芝還到太山遇司命君授以上皇
金籙乃西到流沙濱白水岼遇太素真人乘龍雲輶建
紫宸巾以紫羽為蓋仗七色之節侍從神童玉女各二

百許人在白水沙洲空山之上方遊觀金城鳴玉鍾舞
華幢望在空山之上往而不至君乃身投長淵浮白水
冒洪波越沙岼嶮巖沈溺遂登空山見而拜焉頓頭稽
顙乞請真訣太素真人笑曰危乎濟哉子今日始當得
之矣因口教服二景飛華上奔日月之法又授太上隱
書告君曰此足以爲真矣遂留空山上修二景引日法
誦隱書積十一年太素真人曰子道已成矣因以景雲
龍輿見載羽蓋華寶之儀詣太素宮見上清三元君君

當爾之時亦不知在何處也三元君治太素宮諸仙童
玉女侍者有千餘人以黃金為屋青玉為牀君既詣金
闕再拜稽首三元君以玉璽金真見賜玉女二十四人
玉童三十二人見侍乃乘飛雲中輦復北遊詣太極宮
見太極四真人四真人見授神虎符流金火鈴乃詣太
微宮受書為清靈真人治青靈宮佩三華寶衣乘飛龍
景輿仗青旂玉鉞七色之節遊行上清九宮

西玄者葛衍山之別名葛衍有三山相連西為西玄東

為鬱絕根山中央名葛衍山三山有三府名曰三宮西
玄山為清靈宮葛衍山為紫陽宮鬱絕根山為極真宮
三山纏固萬三千里高二千七百里下有洞庭潛行地
中通玄洲崑崙府也西玄山下有洞臺方圓十里金城
九重有玉堂蘭室東西宮殿中有四百二十真人處焉
其樹則絳碧草則芝英其鳥獸則麒麟鳳皇距崑崙七
萬里其間有高暉山上有洞光如曰葛衍西玄鬱絕根
三山也道人支子元受蔣先生入室精思存五靈之神

光服氣之法常以夜半之時靜室獨處平坐向東瞑目
陰呪曰

蒼無皓靈少陽先生九氣還肝使我覓寧上帝玉籙名
上太清畢因閉氣九息咽液九過叩齒九通次南向瞑
目陰呪曰

赤庭絳雲上有高真三氣歸心是我丹元太微綠字書
名神仙畢因閉氣三息咽液三過叩齒三通次西向瞑
目陰呪曰

素元洞虛天真神廬七氣守肺與神同居白玉金字九
帝之書使我飛仙死名已除畢因閉氣七息咽液七過
叩齒七通次向生年之本命處瞑目陰呪曰

黃元中帝本命之神一氣侍脾使我得真老君玄錄書
名神仙長生久視與命永存畢因閉氣一息咽液一過
叩齒一通次北向瞑目陰呪曰

玄元北極太上之機五氣衛腎龜玉參差神名玉札年
同二儀役使六甲以致八威畢因閉氣五息咽液五過

叩齒五通爾乃存五方之氣都畢又咽液九過北向再拜陰呪曰

謹白太上太極四真君請存五方五靈神使某相見得語言畢乃精思此一法存五靈先服氣陰祝之道與出中庭存法等耳此法乃還要不煩又於靜思易也裴君後重更授傳如此於靜室祝時亦先存五靈在體中使備然後服氣爾庭中之法所修煩多難行又於致神之驗不勝於靜室之速也後出要言祕之勿傳庭中之法

以勸於始學使不懈息爾篤而言之室中為要法支子
元受蔣先生第五首之訣以八節之日存思陳已立身
已來罪過多少之數輸誠自狀已上希天皇諸真開寫
之祐尅身歸善以求長生神仙者也蓋秋分之節者氣
處清靈太和之正日也衆真諸仙是其日皆聽訟焉又
地上刺姦吏部境域諸仙官並糾奏所在道士之功過
及萬民有罪應死生者也仙忌真記曰子欲昇天慎秋
分罪無大小皆上聞以罪求仙甚難是故學道為心

寒此是朱火丹陵仲陽先生之要言矣秋分氣調日和
中順天地者也夫火炎之氣摧於凋落之勢玄水包津
胎於金生之府乃太陽光轉少陽藏養天地於是所以
定剛柔之際合二象之序煥成流明乃別陰陽三元實
八節之標目求道之要梯矣每至其日日中之時上皇
太帝君玉尊陛下乃登廣寒上清靈宅太空之闕丹城
紫臺長錦玉樓羣真集于太微之觀上關九天之真皇
中要太上三老君北及諸真及八海大神下命五嶽名

山諸得道者尊靈萬萬並會于陽寥之殿共集議定天下萬民之罪福記學道求仙者之勤疏議犯過日月修行善惡刑罰之科生死之狀各隨其所屬部境根源條例副之司命書之皇籙罪福纖芥刻于丹城之籍伏匿之犯惡陰德之細切者無不一二縷而知之者也其夕夜半當出中庭北向脫巾再拜長跪上啟太上北極天帝太帝君因容自陳已立身已來犯罪多少之狀乞得赦貫從今自後改往修來之言言之必使信誓于丹心

盟于天地不敢復犯惡之行也其中言在意陳之也畢
云願太上皇帝削其罪名移書三官使神仙之錄某廁
玉札長生久視通真達靈畢又叩齒四下再拜而還靜
室深自刻責并存念三元中神令上啟太上如此者三
名上仙籍罪咎除滅也三元泥丸絳宮丹田三神也存
令三元三神上啟天尊求恩赦助已自陳令必上聞也
三啟秋分生籍乃定死名乃除此一法出經命青圖是
長生秘法矣俗人雖存道未離人間甚多罪咎犯之者

非一恐未便可施用秋分首過之法也入山林中遠去
人事蕭然獨處不犯萬物者乃可為之既有反善之詞
誓有改行之言言已聞於高上之聽慎不可復使犯惡
遠生之事也重犯罪十過天地弗救身死為驗非可復
改補者矣以此求道無所復索也養生者有如水火之
交爾得其益則白日昇天犯戒律則身沒三泉也又此
日獨重於七節趙伯元所謂生死門戶者也三元素語
曰秋判之日尊卑盡會生死之日也古人以秋分之日

為秋判之日也所以爾者秋分之日乃會九天八地衆
真人神上皇至尊三日三夕共定萬民之命所聚議者
咸多而神尊並集故也諸八節日會天地諸真官先後
及節凡三日三夕而各還所司此是支公之口訣又別
此一事不離七節之條例也候夜神童金根經曰八節
之日求仙極會天命衆真皆當集對末節一日萬靈詣
闕節日日中尊卑入謁節後一日罪福分別三日三夕
天事乃畢子其慎罪務為功德名可上真列編太極吾

不試言知者深密急宜謝過秘而慎泄此亦支公所告
出以傳示裴君太素真人教裴君二事為真人之法曰
旦視日初出之時臨目閉氣十息因又咽日光十過當
存令日光霞使入口中即而吞之畢仍存青帝君從日
光中來在我之左次存赤帝君從日光中來在我之右
次存白帝君從日光中來在我之背次存黑帝君從日
光中來在我之左手上次存黃帝君從日光中來在我
之右手上五帝都來乃又存陽燧絳雲之車駕九龍從

日光中來到我之前仍與五君共載而奔日也裴君止
於空山之上修行精思一年之中髣髴形象二年之中
五帝俱乘日形見在左右三年之中終日而言語笑樂
五年之中五帝日君遂與裴君驂乘飛龍之車東到日
窟之天東蒙長丘大桑之官八極之城登明真之臺坐
希琳之殿授裴君以揮神之章九有之符食青精日糴
飲雲碧玄腴於是與五帝日君日日而遊此所謂奔日
之道也日中亦有五帝一曰日君太上隱書中篇曰子

欲為真當存日君駕龍驂鳳乘天景雲東遊希琳遂入
帝門精思仍得要道不煩名上清靈列位真官乃執鬱
儀丈第二事為真人之法日夕視月臨目閉氣九息因
又咽月光九過當存月光使入口中即而吞之畢仍存
青帝夫人從月光中來在我之左次又存赤帝夫人從
月光中來在我之右次又存白帝夫人從月光中來在
我之背次又存黑帝夫人從月光中來在我左手上次
又存黃帝夫人從月光中來在我右手上五帝夫人都

來乃又存流鈴飛雲之車駕十龍從月光中來到我之
前仍存五夫人共載而奔月也裴君止於空山之上修
行精思一年之中髣髴姿容二年之中五夫人遂俱乘
月形見在君左右三年之中並共笑樂言語五年之中
五帝月夫人遂與君共乘飛龍之車西到六嶺之門八
絡之丘協晨之宮八景之城登七靈之臺坐太和之殿
授裴君流星夜光之章十明之符食黃琬紫精之糒飲
月華雲膏於是與五夫人夕夕共遊此所謂奔月之道

矣月中亦有五帝夫人外經云日君月夫人者是少有
髣髴也太上隱書中篇曰子欲昇天當存月夫人駕十
飛龍乘我流鈴西到六嶺遂入帝堂精思乃見上朝天
皇乃執結璘章裴君白日精思對日存日中五帝君夜
則精思對月存月中五夫人五年之中日月精神並到
共乘飛龍上遊太玄始學則五靈形見授書賜芝終成
則日月五帝君五夫人驂轡清虛乘雲太丹朝謁三元
稽首金闕乃獲玉璽金真威制羣神役使玉女玉童北

朝四真人受書為真佩神虎之符以制嚴六天授流金之鈴以命召衆精仗青旄之節以周流九宮皆由精思微妙幽感天心是以靈降扶身上昇帝庭爾道士行之者則是耳不必以已仙人也若處密室及日月不見時但心中存而思之可也不待見日月要見視之為至佳惟精思心盡無所不通此言要也臨目者令目當閉而不閉之間也少令得見日月之光景密而行之勿令人知雖襟人同室而止有密其思者比肩仍自不覺每事

盡當爾不但此一條而已求生養命在於心三丹田三寸之間耳是以龍變蟬蛻皆以一致而成也八素經曰仙者心學心誠則成仙道者內求內密則道來榮者外求口發則貴至財者動心心寂則富集諸寂動異用而所攻者一守之在役用之機也

太素真人曰為真不知道者亦復多耳要於乘光揚景騰雲昇虛並日月之精遊九天之表餐霞飲玄呼吸太和乃不可不為此竒道此道亦易成而速得也衆真有

不知此道者見吾乘雲而攜日月五帝五夫人莫不敬親而求請問之也吾亦復未示之也內視中方曰子欲步空常當存日月子欲登清泠當存五星密室密行不出宇庭此之謂也

夫守道者及學道求仙者修行至精皆可為之為之既得便成昇天仙人也此道不必真人而當獨行之也子有真骨真性而密行之必能含章守慎不妄傳泄故以相教耳黃老祕言曰子得鬱儀結璘乃成上清之真子

得太洞真經乃能飛行上清無此三文不得見三元君
要道盡此仙子加勤中仙都無知此道者此道相傳惟
口訣耳能知此道不問賢愚皆乘雲昇天役使鬼神羣
仙立盟為約不得妄宣泄則滅門口訣者黃老祕言是
也裴君受命留在空山之上精思存修二事五年之中
得見日月之精五帝夫人讀隱書及九有十明之符積
十一年太素真人來告曰子成真矣因錫以龍車給以
羽蓋並日月之遊精參五帝之同來詣太素宮見上清

三元君受玉璽金真給玉女二十四人玉童三十二人
北遊詣太極宮及太微宮位為清靈真人太素真人曰
子存日精五帝君口含太上鬱儀文須此道成乃見日
中君無此徒勞自煩冤太素真人曰子存月精五帝月
夫人口含太上結璘章須此道成乃見月中夫人無此
徒勞自悼傷

右二條太素真人受太帝君訣言

太上隱書云存時執之帝君云含之太素真人教裴君

存時含一文執一文並行之太上隱書曰欲行此道不
必愚賢但地上無此文耳真官玄法啟誓乃傳金丹之
信道乃備焉青帛之盟道乃可宣有得而行位為真人
乃乘步景雲晏羽旂瓊輪遊行九天上詣太極宮謁高
皇上元君裴君乃先容受太上鬱儀文太上結璘章二
書然後齋戒而得存日月之精爾有仙名骨錄者乃得
見此二書見之者仙為之者真鬱儀結璘經及大洞真
經乃太極四真人之所祕上清天皇之所珍貴也西玄

山下洞臺中有此書刻以玉簡書以金字及王屋清虛
洞中亦見有鬱儀結璘之篇目爾而不盡備具惟太玄
宮高上臺及蓬萊府北室金柱玉壁刻文並備具也精
心存念晝夜為之十一年而成爾與修洞經者大都等
爾夫此二文是洞經之祖宗素靈經之園圃爾凡諸下
仙莫有聞鬱儀之篇目結璘之密旨者得其道皆速成
而無試也又致神之驗是為遲疾得其要道者但速於
大洞之秘妙爾非有仙名者皆不得聞見此書聞見此書

而敢妄以語一人者即減侍真官玉女玉童各十人自然使天火災而失之語二人已上不可得以學仙也按泄洞經之科條即已有輕重之異減損侍真便十倍於大洞地上骨錄有相之道人而有此書者皆為師主男稱監靈大夫女稱執明大夫男稱左女稱右素奏丹符曰大哉鬱儀妙行結璘非上真不見非上仙不聞以致日月五精之神乘龍步空足躡景雲遂與五帝上入天門有之聞之慎勿妄言去世可出誓金乃傳要付弟子

有心之者勿道篇目玉童上言泄則被考身終不仙玉童玉女去而不還書文必失獲刑三官子其慎之言為罪先峨嵋山北洞中石室戶樞刻石書字曰鬱儀引日精結璘致月神得道為上官位稱大夫真凡二十字下仙讀此不解其意仙人自有不見其篇目者多矣其金液九丹蓋小術也皆不得飛行上清大洞真經有泄之者按元中科即減一紀玉童玉女各減一人三泄之身死不得復成仙人太上鬱儀文結璘章有泄之者減玉

童玉女各十人天火燒屋書從火中失而還上天也再
泄身刑死不復生學道終不成仙也泄言妄說篇目並
受考於三官師有當因緣去世之日或歸返陰塗絕迹
藏變之時要當有所授若無其人乃自隨身受之者皆
青金丹縷之跪為誓天地不泄宣之盟約乃得出之師
隨事上聞而有奏署日月也不從科條皆為妄泄大洞
真經乃中央黃老君之寶書非至真上士有玉名之者
莫見篇章條目也真仙亦有不聞此書者矣初限令一

百年乃得一出傳可成而不得妄說篇目太上鬱儀結
璘文章以致於日月之精神上奔日月通天光飛太空
之道也皆乘雲車羽蓋駕命羣龍而上昇皇天紫庭也
大洞真經以致於朝靈之道招神成真人之法也乘雲
駕龍騰躍玄虛衣繡羽佩金真玉光逍遙太霞上昇九
霄矣此二書天帝之祕塗微妙哉太素真人猶隱其篇
目但漫云二事者是祕諱之甚也況世人而令知其甲
乙乎有相遇而得之者至誠好事仍可為之別有事旨

故不一二裴君所受真書篇目列之於左

支子元神訣五首蔣先生所祕用咸陽城南佛圖中曲室密房受之

青帝君授紫微始青道經一卷

蒼帝君授蒼元上籙北斗真經中命四旋經四卷

白帝君授太素玉籙寶玄經三卷

赤帝君授龍胎太和丹經二卷

黃帝君授四氣上樞大元黃書八卷

青帝君授通光陽霞之符

蒼帝君授鬱真蕭鳳之符

白帝君授皓靈扶希之符

赤帝君授四明朱碧之符

黃帝君授中元八維玉門之符

右十書於太華山西洞玄石室受之

谷希子青帝君授青精日水青華芝東到青丘授服上
司命君授上皇金籙在太山授

太素真人授太上鬱儀丈在白水沙洲空山之上授
太素真人授太上結璘文在白水沙洲空山之上授
太素真人授太上隱書在白水沙洲空山之上授
上清三元君授玉璽金真在太素宮金闕下授

四真人授神虎符流金火鈴在太極宮授

日中五帝君授揮神之章九有之符青精日糒雲碧玄
腴

日中五帝夫人授流星夜光章十明之符黃琬紫津之

粘月華雲膏

右裴君所受衆書符之目

裴君受支子元服茯苓法焦山蔣先生所傳茯苓五斤
盛治去外皮乃擣下細篩以漬白蜜三斗中盛之以銅
器若耐熱曰瓦器以此器著大釜中著水裁半於所盛
藥器腹微火燒釜令水沸煮藥器數反側藥令相和合
良久蜜銷竭煎出著鐵臼中擣三萬杵令可丸但服三
十丸如梧桐子大百日百病除二百日可夜書二年使

鬼神四年玉女侍衛十年夜視有光能隱能彰長生久
視服此一年百害不能傷疾病不復干色反嬰兒肌膚
充悅白髮再黑眼有流光合藥齋三日煮之於密盛處
勿令婦人雞犬見及穢慢之也五斤茯苓三斗白蜜為
一劑當作木蓋蓋之煮藥器上勿露也煮之時反側藥
熟乃開之耳火以好薪炭不可用不成樵輩以煮之也
當用意伺候料視恒以為意欲并合多少在意藥成預
作九盛之以密器可經於千歲不敗

裴君受支子元服胡麻法蔣先生於黃金鼈祖山中授
支公也

胡麻三斗肥者黃黑無拘在可擇之使精潔於微火上
熬令香氣極令燥細擣以為散令沒沒爾勿下筴白蜜
三斗以胡麻散漬會蜜中攪令相和使調巾安器著釜
水中乃煮如前煮茯苓法也伺候令煎竭可擣乃出擣
之三萬杵如桐子大旦服三十九盡一劑腸化為筋不
知寒熱面反童顏役使衆靈蔣先生惟服此二方先生

已凌煙化升呼吸立至出入無間與乘羣龍上朝帝真
位為仙宗者也當籙擇胡麻令精此二方與世方書小
異裴君所祕者驗而有實也云體先不虛損及年少之
時當服茯苓若出三十者當服胡麻蔣先生云此二方
是大有之要法長生神仙之祕寶寶玄經云茯苓治少
胡麻治老合以齋戒服以朝蚤并醴華腴蜜也火精茯苓
以為一還精歸寶此之謂也并醴華腴蜜也火精茯苓
也水寶胡麻也裴君以年少時所用故服茯苓二方同

耳皆長生不死必仙之奇方也若大有資力者亦可合
二物倍用蜜共煎搗以為丸乃佳亦並治老少矣茯苓
胡麻不必別作之也此二方蔣先生乃各在一處授支
公不頓之也是以焦山而茯苓方傳鼈祖而胡麻方出
明道祕之文乃不可得一盡其根源也至於支公授裴
君亦乃頓倒囊笈之奧言肆傾玄真之祕塗將以逆鑒
察天籙必當已知應為仙真乎



雲笈七籤卷一百五

欽定四庫全書

子部

雲笈七籤卷一百七

詳校官監察御史_臣邱雍澍

檢討_臣何思鈞覆勘

總校官庶吉士_臣倉聖脉

校對官庶吉士_臣潘庭筠

謄錄監生_臣胡金芝

欽定四庫全書

雲笈七籤卷一百六

宋 張君房 撰

傳

清虛真人王君內傳

弟子南嶽夫人魏華存撰

華存師清虛真人王君諱褒字子登范陽襄平人也安國侯七世之孫君以漢元帝建昭三年九月二十七日誕焉洪基大業世籍貴盛君父諱楷以德行懿美比州所稱舉茂才除議郎轉中壘大夫上黨太守黃門侍郎

侍中左將軍雁門太守楷正色彤管坦誠獻替納言推
謨披衿拔領率職蒞民政以禮成捨刑寬賦不肅而敬
天子賢之遷殿上三者使賓皇太子講春秋尚書論語
禮易恢恢仁長循循善誘微言既甄搢紳秉其範大義
已陳百王格其準遷光祿大夫謚曰文侯夫人司馬遷
之孫淑慎沈博德配母儀蓋以清源高流圓穎遠映靈
根散條芳華朗曜是用忠孝啟於上葉善誘彰於文德
世載英旄斯人有焉君體六和之妙炁挺天然之嘉質

含嶽秀以植韻秉靈符而標貴暉灼煥於三晨峻逸超
於玄風少讀五經傍看百子綜算象緯通探陰陽及風
无律呂靡有不覽也父為聘丞相孔光女娶婦在室以
和人倫而君凝形淳觀明德獨往高期真全絕不內盼
峨峨焉若望慶雲之沓軫浩浩焉似汎滄溟之無極神
棲萬物之嶺无邁霄漢之津鴻漸鄧林展翮東園將藏
鳳羽以翳於南風匿龍華以沈於幽源是乃夜光潛躍
映耀於難掩遂名沸絕圃聲馳京夏四府交辟君即閒

夜之感喟然悲歎曰人間塵囂趨競得失利害相攻有
踰鵠雛之視老燕矣遂決志辭親入華山中九年契闊
備至精感昊穹神映幽人體期冥靈心唱至真爾一日
夜半忽聞林澤中有人馬之聲簫鼓之音須臾之間漸
近此山仰而望之見千騎萬乘浮虛空而至神人乘三
素雲輦手把虎符朱鉞啟途握節執旄曲晨傾蔭錦旂
蔽虛神人暫停駕而言曰吾太極真人西梁子文也聞
子好道劬勞山林未該真要誠可愍也勤企長生實為

至矣君乃馳詣輪轂之下叩頭自搏而言曰褒以肉人
愚頑庸賤體染風塵恣躁亂性然少好生道莫知以度
真人曰夫學道無師無緣自解我太極真人神仙之司
主試校學者領舉正真爾於玄籙上清金書東華名編
清虛位登小有必當掌括寶籍為天王之任爾但注心
四景勤慕上業道自成也後隱陽洛山中感南極夫人
西城真人並降南極夫人乃指西城曰君當為王子登
之師子登亦佳弟子也良久西城真人長嘆而謂君曰

夫學道者諒不可以倉卒期求生者不可以立爾綜故
冥術棲於玄元而高偕太妙凌重霄以纍抗矣夫道雖
無形其實有焉妙雖昧昧其實坦然子當勤求其無然
後見其至有子廣延諸妙然後究其坦大得有則有生
得妙則年全也子求生雖篤而未見其涯慕道雖勤而
未啟其門殆猶沿湧波以索鳥巢尋長木而訪淵鱗爾
是故子心疲於導引而朱宮為之喪潰肺弊於理炁故
神華為之凋落肝勞於視盼而魂精為之遼索脾竭於

守神而丹田為之閼滯腎困於經緯而津液為之不澤
膽銳於趨競故四肢為之亂作五臟相攻六府顛覆三
焦滯而不瀉八關絕而無續賴餽飯以勁汝身恃丹青
以固汝內爾正可却衰白之凋折猶不免必死之期會
徒有萬年之壽豈足貴乎西城真人遂以即日授君太
上寶文八素隱書大洞真經靈書八道紫度炎光石精
玉馬神真虎文高仙羽玄凡三十一卷依科立盟結誓
而付乃將君觀玄洲須臾而至四面大海懸濤千丈洲

上宮闕朱閣樓觀瓊室瑤房不可稱記西城真人曰此
僊都之府太上丈人處之乃將君入紫桂宮見丈人著
流霞羽袍冠芙蓉之冠腰帶神光手把火鈴侍女數百
龍虎衛階太上丈人與西城真人相禮而已相攜共坐
君時侍側焉太上丈人曰彼所謂王子登乎學道遭逢
良師將得之矣西城真人笑因命君拜拜畢太上丈人
使坐北向丈人乃設廚膳呼吸立具靈肴千種丹醴湛
溢燔煙震檀飛節玄香陳鈞天之大樂擊金璫於七芒

崆峒啓音徹朗天丘於是龍騰雲崖飛鳳鳴嘯山阜洪
鯨湧波凌濤雲起太虛風生廣遼靈歌九真雅吟空無
玉華作唱西妃折腰爾乃衆仙揮袂萬神遷延羽童拊
節慶雲纏綿於是太上丈人會二十九真人皆玄洲之
太真公也其第一真人自稱主仙道君指君而向西城
真人言曰彼悠悠者將西城之室客上宰之賓友耶視
此子心眸澄邈神渟形凝圓晨不煥六景發華殆真人
之美者小有之賢王也夫彼果何人哉於是西城真人

笑而答曰道君今何清音之不妙曲問之陋碎哉請粗
陳其歸要焉蓋夫聖匠剖太混之一朴分為億萬之體
發大蘊之一包散為無窮之物是故立三光呼天而置
晷儀封區域呼地而制五服制漏刻以分日夜正四時
以財歲月五位以正方面山川以定險阻城郭以自居
焉兵械以自衛焉旌旗輿服以自表用九穀以自養凡
此之類象玄乎天而形存乎地日月有幽明之分寒暑
有生殺之炁震雷有出入之期風雨有動靜之節類炁

浮乎上而衆精流乎下廢興之數治亂之運賢愚之質
善惡之性剛柔之炁壽夭之命貴賤之位尊卑之班吉
凶之徵窮達之期普陳矣性發乎天而命成乎人也故
立之者天而行之者道受焉性合神同混而為一流通
並行不可細得分別也於是主仙道君命侍女范運華
趙峻珠王抱臺等發瓊笈披綠蘊出上清隱書龍文八
靈真經二卷授子登又以雲碧陽水晨飛丹腴二升賜
君君拜服之真人遂將君還西城九年道成給飛翺之

車東行渡啟明滄海登廣桑山入始暉庭詣太帝君稽
首再拜太帝授以龍景九文紫鳳赤書上清神圖八道
玉籙次南行渡渤海丹海登長離山詣南極紫元夫人
一號南極元君授以九道迴玄太丹綠書又詣赤臺童
子華蓋上公授以五雲夜光雲琅冰霜南極夫人曰昔
日之言豈負舉哉君稽首謝恩辭退次西行渡庾丘巨
海沈羽之津登麗農山詣紫蓋晨夫人景真三皇道君
授以玉道綠字迴曜太真隱書次北遊渡彫柔玄海濟

飲龍上河匏瓜津登廣野山詣高上虛皇大道玉君會
其出遊駕日月之晨乘紫始之光鬱靄黃素之雲勃蔚
八景之曜飛真萬億不可稱數君再拜道側唱者曰聞
君乃詣上清玉晨帝君玄清六微元君二君授以寶洞
飛霄絕玄金章及賜太極隱書龍明珠絳和雲芝君拜
而飲之即身金色項映圓光七曜散華流煥映形又退
登閭風之野玄圃之宮詣中皇玉帝受解形遯變流景
三經乃越鬱絕濟弱河西詣龜臺謁九靈太真上清夫

人退更清齋三月受三華寶曜瓊文琅書靈暉上錄七
晨素經退又清齋三年浮浩汗之河登白空虞山山周
迴三萬里遊行翌日趨詣紫清太素瓊闕即大素三元
上道君所治焉處丹靈白玉宮飛映絕曜紫霞落煥七
光交陳結於雲宇之上奇麗玄黃不可名字仙童玉女
侍右天尊蓋無數也君既至稽首再拜詣瓊闕之下久
時太素三元上道君乃使繡衣命者西林藻授君金真
玉光流金火鈴豁落七元八景飛晨又使清真左夫人

郭靈蓋右陽玉華仲飛姬齋神策玉璽授君以為太素
清虛真人領小有天王三元四司右保上公治王屋山
洞天之中給玉童玉女各三百人主領上清玉章太素
寶玄太極上品九天靈文六合祕籍山海妙經悉主之
焉又總括洞內明景三寶得乘虎旂龍輦金蓋瓊輪八
景飛輿出入上清受事太素寢宴太極也後歸西城清
齋三月授書為太素清虛真人矣

紫陽真人周君內傳

紫陽真人姓周諱義山字季通汝陰人也漢丞相勃七世之孫以冠族播流世居貴宦祖父玄元鳳元年為青州刺史父祕為范陽令時君始生焉父後積秩累遷官至陳留刺史君時年十六隨從在郡始讀孝經論語周易為人沈重少言笑喜怒不形於色好獨坐靜處不結名好然精思微密所存必感常以平旦之後日出之前正東向立漱口咽液服炁百數向日再拜旦旦如此為之經年父怪而問之所行何等君長跪對曰義山中心

好日光長景之暉是以拜之爾至月朔旦之日輒遊市
及閭閻陋巷之中見窮乏飢餓之人解衣與之時時上
登山喟然悲歎或入石室中歡然獨笑時陳留大儒
名士聞君盛德體性沈美咸修詣焉君輒稱疾不見賓
客漢侍中蔡咸陳留高士亦頗知道聞君德行數往詣
君輒解疾不欲見之父乃大怪怒責之督切使出見之
既不得已遂出相見咸大發清談及論神仙之道變化
之事君乃凝默內閉斂神虛靜頷而和之一不答也是

歲大旱斗米千錢路多飢孍君乃傾財竭家以濟其困
陰行之人亦不知是君之慈施也對萬物如臨赤子斯
積善德仁愛之施矣後遇陳留黃泰告君曰聞君好道
陰德流行用思微妙誠感於我是以相詣吾是中嶽仙
人須林字子玄也本衛人靈公末年生少好道德受學
於岑先生見授鍊身消災之道術後又遇仇公公乃見
教以服炁之法還神守竈之事吾行之甚驗大得其益
子少知還陽精髓不泄又知導引服炁吞景咽漿不復

須陰丹內術補胎之益也然猶三蟲未壞三尸未死故
導引服炁不得其理可先服制蟲細丸以殺穀蟲蟲有
三名一名青姑二名白姑三名血尸謂之三蟲三蟲在
內令人心煩滿意志不開所思不固失食則飢悲愁感
動精志不至仍以飲食不節斷也雖復斷穀人體重滯
奄奄淡悶所夢非真顛倒醜錯邪俗不除皆由此蟲在
內搖動五藏故也殺蟲之方如後

附子

五兩

麻子

七升

地黃

六兩

米

七兩

茱萸根

大者

桂

四

兩

雲芝英

五兩

凡七種先取菖蒲根煮濃作酒使清淳重美一斗半以七種藥咬咀內器中漬之亦可不用咬咀三宿乃出曝之令燥又取前酒汁漬之三宿又出曝之須酒盡乃止曝令燥內鐵臼中擣之下細篩令成粉取白蜜和之令可丸以平旦東向初服二丸如小豆漸益一九乃可至十餘丸也治腹內絃實上炁心胃結塞益肌膚令體輕有光華盡一劑則蟲死蟲死則三尸枯三尸枯則自然

落矣亦可數作不限一劑也然後合四鎮丸加曾青黃
精各一兩以斷穀畢若導引服炁不得其理可先服食
衆草藥巨勝茯苓朮桂天門冬黃連地黃大黃桃膠及
皮任擇焉雖服此藥以得其力不得九轉神丹金液之
道不能飛仙矣為可延年益壽亦辟其死也君按次為
之服食朮五年身生光澤徹視內見五臟乃就仙人求
飛仙要訣仙人曰藥有數種仙有數品有乘雲駕龍白
日升天與太極真人為友拜為仙宮之主其位可司真

公定元公太生公及中黃大夫九氣丈人仙都公此皆
上仙也或為仙卿大夫上仙之次也遊行五嶽或造太
清役使鬼神中仙也或受封一山總領鬼神或遊翔小
有羣集清虛之宮中仙之次也若食穀不死日中無影
下仙也或白日尸解過死太陰然後乃仙下仙之次也
我受消子祕要是中仙耳子名上金書當為真人我之
道非子為真人所學也今以守三一之法靈妙小有之
書二百事傳子石菌朱柯若乾芝與子服之吾道畢矣

子可遠索師也君再拜受教退而服神芝五年目視千里外日行五百里遂巡行名下尋索仙人聞蒙山藥先生能讀龍躋經遂往尋之遇衍門子於是授以龍躋經及三皇內文退登王屋山遇趙佗子受芝圖十六首及五行祕符又遇黃先生受黃素神方五帝六甲左右靈飛之書四十四訣退登礪冢山遇上衛君受太素傳左乙混洞東蒙之錄右庾素文攝殺之律退登嵩高山遇中央黃老君合會仙人在其上太室洞門之內君頓頭

再拜乞長生度世黃老君曰子存洞房之內見白元君
耶君對曰實存洞房嘗見白元君黃老君曰子道未足
矣未見無英君也且復游行受諸要訣當以上真道經
授子矣見白元君下仙之事可壽三千年見無英君乃
為真也可壽一萬年矣君再拜受教而退遊行天下名
山大澤西登白空山遇沙野帛先生受太清上經退登
峨嵋山入空洞金府遇寧先生受太丹隱書八稟十訣
退登岷山遇陰先生受九赤班符退登岐山遇臧延甫

受憂樂曲素訣辭乃登梁山遇淮南子成受天關三圖
乃退登牛首山遇張子房受太清真經乃退登九嶷山
遇李伯陽受李氏幽經乃遊登鍾山遇高丘子受金丹
方二十七首乃登鶴鳴山遇陽安君受金液丹經九鼎
神丹圖乃登猛山遇青精先生受黃素傳乃登陸渾山
潛入伊水洞室遇李子耳受隱地八術乃登戎山遇趙伯
玄受三九素語乃登陽洛山遇幼陽君受青要紫書三
五順行乃登霍山遇司命君受經命青圖上皇民籍乃

登鳥鼠山遇墨翟子受紫度炎光內視圖中經乃登曜
名山遇太帝侯夜神童受金根之經乃登委羽山遇司
馬季主受石精金光藏景化形乃登大庭山遇劉子先
受七變神法乃登都廣建木遇谷希子受黃炁之法太
空之術陽精三道之要乃登桐栢山遇王喬受素奏丹
符乃登太華山遇南嶽赤松子受上元真君書乃登太
冥山遇九老仙都君受黃水月華四真法乃登合黎山
遇皇人受八素真經太上隱書乃登景山遇黃臺萬畢

先生受九真中經乃登玄壺羽山遇玉童十人九炁丈
人得白羽紫蓋服黃水月華法乃到桑林登扶廣山遇
青真小童君受金書祕字乃退南行朱火登丹陵山遇
龔仲陽受仙忌真記乃西遊登空山見無英君而退洞
房中無英君處其左白元君處其右黃老君處其中無
英君服金精朱碧玉綾之袍光赤朝霞流景耀天要太
上靈炁之章佩九帝祛邪之策戴翠上紫靈之冠蓋太
玄丹靈上元赤子之祖父也左連青宮之炁炁灌萬神

乃未有天地先自虛空而生矣白元君服丹玉之錦雲
羅重袍白光內朱流景參天垂暉映神玄黃徹虛要太
上靈精之章佩玄元攝魔之策戴招龍皂冠蓋玉房雲
庭上元赤子之父右夾皓青之室朝運生者也中央黃
老君是太極四真王之師老矣上攝九天中游崑崙黃
闕來其外紫戶在其內下與二君入洞房圓三寸威儀
具焉夫至思神見得為真人若見白元君得為下真壽
三千歲若見無英得為中真壽萬歲若見黃老與天相

傾上為真人列名金臺君既詣之乃再拜頓首乞與上
真要訣黃老君曰可還視子洞房中君乃冥目內視良
久果見洞房之中有二神人無英白元君也被服狀如
在空山中者黃老君笑言曰微乎深哉子用意思之精
也此白日升天之道子還登常山授子上真之道君乃
還常山石室中齋戒念道復積九十餘年中白元君無
英君黃老君遂使授之大洞真經三十九篇有玉童二
十一人玉女二十一人皆侍直燒香晝夜習之積十一

年遂乘雲駕龍白日升天上詣太微宮受書為紫陽真人佩黃旄之節八威之策帶流金之鈴服自然之衣食玉醴之粒飲金液之漿治葛衍山金庭銅城所謂紫陽宮也紫陽有八真人君處其右一日三登崑崙一朝太微帝君以礪冢為紫陽別宮所謂洞庭潛宮也礪冢山有洞穴潛行通王屋清虛小有天亦潛通閬風也

馬明生真人傳

馬明生者齊國臨淄人也本姓和字君寶少為縣吏捕

賊為賊所傷遇太真夫人適東嶽見而憫之當時殆死
良久忽見一女子年可十六七服奇麗姿容絕世行步
其傍問君寶曰汝何傷也君寶以實對夫人曰汝所
傷乃重刃關於肺五臟泄漏血凝絳府炁激腸外此將
死之急也不可復生如何君寶知是神人叩頭求哀乞
賜救護夫人於肘後筒中出藥一丸大如小豆即令服
之登時而愈血絕瘡合無復慘痛君寶再拜跪曰家財
不足以謝不知何以奉答恩施惟當自展駑力以報所

受爾夫人曰汝必欲以謝我意亦可佳可見隨去否君
寶乃易名姓自號馬明生隨夫人執役夫人入東嶽岱
宗山峭壁石室之中上下懸絕重巖深隱去地千餘丈
石室中有金牀玉几珍物奇瑋乃人跡所不能至處也
明生初但欲學金瘡方既見其神仙來往乃知有不死
之道旦夕供給掃灑不敢懈怠夫人亦以鬼怪狼虎眩
惑衆變試之明生神情澄正終不恐懼又使明生他行
別宿因以好女於臥息之間調戲令接之明生心堅志

靜固無邪念夫人或行去十日五日還或一月二十日
輒見有仙人賓客乘龍駕鳳往來或有拜謁者真仙彌
日盈座客到輒令明生出外別室或立致精細廚食肴
果非常香酒奇漿不覺而至不可目名或呼明生坐與
之同飲食又聞空中有琴瑟之音歌聲宛妙夫人亦時
自彈琴琴有一弦五音並奏高玄響激聞於數里衆鳥
皆為集於岫室之間徘徊飛翔驅之不去蓋天人之樂
自然之妙音也夫人棲止常與明生同石室中而異榻

爾幽寂之所都惟二人或行去亦不道所往之處但見
常有一白龍來迎夫人即著雲光繡袍乘白龍而去袍
上專是明月珠綴著衣縫帶玉佩戴金華太玄之冠亦
不見有從者既還即龍自去不知所在石室玉牀之上
有紫錦被褥緋羅之帳中有服玩之物瑰金函英玄黃
羅列非世所有不能一一知其名也有兩卷素書上題
曰九天太上道經明生亦竟不敢發舒視其文也惟供
給掃灑守巖室而已至於玩服亦不敢竊闕之亦不敢

有所請問如此五年愈加勤肅輒不怠惰夫人歎而謂之曰汝可謂真可教也必能得道者也以子俗人而不淫不慢恭仰靈炁而莫之廢雖欲求死亦焉可得乎因以姓字本末告之曰我名婉羅字勃遂事元都太真子為三天太上府都官司直總糾天曹事官秩比人間卿佐也年少數委官遊逸虛廢事任有司奏劾降主東嶽退真王之編司鬼神之神五百年一代其職因來視之勵其後使修守政事以補其過我久在人間今奉天

皇命又被太上召不復得停念汝專謹故以相語欲教汝長生之方延年之術而我所受服以太和自然龍胎之體適可授三天真人不可以教始學之者固非汝所得聞矣縱或聞之亦必不能用以持身也有安期先生曉金液丹法其方祕要便可立用是九君太一之道白日升天者矣安期明日來吾將以汝付囑之焉相隨稍久其術必傳明日安期先生至乘駿驎著緋衣戴遠遊冠帶玉珮及虎頭鞶囊視之可年二十許潔白嚴整從六

七僊人皆執節奉衛見夫人揖之甚謹稱下官須臾設
酒果廚膳飲宴半日許夫人語明生曰吾不復得停汝
隨此君去勿憂念也我亦時時當往視汝因以五言詩
二篇贈之可以相存明生流涕而辭乃隨先生受九丹
之道詩曰

其一

暫捨墉城內命駕岱山阿仰瞻太清闕雲樓鬱嵯峨虛
中有真人來往何紛葩鍊形保自然俯仰食太和朝朝

九天王夕館還西華流精可飛騰吐納養青牙至藥非
金石風生自然歌上下凌景霄羽衣何娑婆五嶽非妾
室元都是我家下看榮競子篤似蛙與蟆顧盼塵濁中
憂患自相羅苟未悟妙旨安事於琢磨禍湊由道泄密
慎福驕多

其二

昔生崑陵宮共講天年延金液雖可遐未若太和僊仰
登冥靈臺虛想詠靈人忽遇扶桑王九老仙都真駕驂

紫虬輦靈顏一何鮮啟我尋長途邀我自然津告以鴻
飛術受以玉胎篇瓊膏凝玄炁素女為我陳俯挹琳鳳
腴仰上飄三天雲綱立爾步五嶽可暫還玄都安足遠
蓬萊山脚間傳授相親愛結友為天人替即游刑對禍
必無愚賢祕則享無傾泄則軀身顛

明生乃隨安期先生負笈西之女几北到圓丘南至秦
廬潛及青城九嶷周遊天下二十年中勤苦備嘗安期
乃曰子真有仙骨何專恭之甚耶吾所不及也遂授以

太清金液神丹方而告之曰子若未欲升天但先服半劑與明生相別而去明生乃入華陰山依方合金丹餌之半劑得仙而與俗人無異人莫識其非凡漢靈帝時惟太傅胡廣知其有道嘗訪明生以國祚大期問之明生初不對後亦告焉無不驗者後人怪其不老遂復服金丹半劑白日昇天臨去著詩三首以示將來漢光和三年也詩曰

其一

太和何久長人命將不永喻如朝露晞奄忽睡覺頃生
生世所悟傷生由莫靜我將尋真人澄神挹容景盤桓
崑陵宮玄都可馳騁涓子牽我遊太真來見省朝朝王
母前夕歸鍾嶽嶺仰採瓊瑤葩俯漱琳琅井千齡猶一
刻萬紀如電頃

其二

天地自有常人命最驗堯年若驚弦發時猶輕矢逝雖
有灼灼姿玉為塵土穢林草無秋耀綠葉豈終歲惜此

繁茂摧哀彼寒霜厲有存理必亡有興故有廢真官戲
玄津與物無凝滯神冲紫霄內形棲山水際對虛忘有
懷遊目記容裔風塵將何來真道故可大

其三

濁塗諒為歎世樂豈足預振褐掃塵遐飄飄獨遠舉寥
寥巖嶽際蕭蕭縱萬慮靈真與我遊落景乘鴻御朝乘
雲輪來夕駕扶搖去噉嘈天地中囂聲安得附

陰真君傳

陰真君自叙附

陰長生者新野人漢和帝永元八年三月己丑立皇后
陰氏即長生之曾孫也少處富貴之門而不好榮位潛
居隱身專務道術未聞有馬明生得度世之道乃以入
諸名山求之到南陽太和山中得與相見乃執奴僕之
役親運履舄之勞明生不教以度世之法但旦夕與之
高談榮華當世之事治生園圃之業十餘年長生未嘗
懈怠同時有共事明生者十二人皆怨恚歸去獨長生
禮敬彌肅而明生數因言語得失之際屢罵之長生乃

和顏悅心奉謝不及如此積二十年後清閒之日明生問其所欲長生跽曰惟乞生爾今以冀草之身委質天匠不敢有所汲汲憚於遲速也明生哀其語乃告之曰子真是能得道者也乃將長生入青城山中煮黃土為金以示之立壇軟血即日以太清金液神丹授之欲別去長生乃叩頭陳謝暫留仙駕拜辭曰弟子少長豪傑希執卑遜尅身勵已若臨冰谷不能宏道讚德宣暢妙味徒尸素壁立而老耄及之是以心存生契捨世尋真

天賜嘉會有幸遭遇自執箕箒二十二年心力莫植常
懼毀替筋力弱薄微效靡騁思養不酬夙夜感慨告
以更生頓受靈方是將灰之質蒙延續之年炎林焦草
惠膏澤之霑若絕烝以其蘇息瞽闇開其視聽感荷殊
戴非陋辭所謝昔太歲庚辰聞先生與南嶽真人洪崖
君雲成公瀛洲仙女數人共坐論傳授當委絹之誓教
授有交帶之盟應祭九老仙都九烝丈人諸君禱祠受
之大藥必行不祭而受為之不成弟子預在曲室嘗侍

惟側亦具聞諸仙起末得道之言說昔受斯節度矣先生今日見諭不復陳此或非先生所授之不盡將恐是弟子困窮爾馬明生慰諭之曰非有不盡汝性耽玄味專炁而和靈官幽鑒以相察矣不復煩委為俗人之信耳於是長生入武當山石室中合丹又服半劑不即升天而大作黃金數萬斤以布施天下窮乏不問識與不識周行天下與妻息相隨舉門皆壽後委之入平都山白日升天臨去著書九篇云上古仙者多矣不可具記

而論但漢興已來高士得仙者四十五人迨予為六矣
二十人見尸解去餘者白日升天焉弟子丹陽葛洪字
稚川日嘗聞謬言有云不夜行則不知道上有夜行人
今不得仙者亦安知天下山林間密自有學道得仙者
耶陰君已服神藥雖未升天然方以嚴麗同聲相應便
自與仙人相尋求聞見故知此近世諸仙人之數爾而
俗人謂為不然已所不聞則謂之無有不亦悲哉夫草
澤間士以隱逸得志經籍自娛不耀文彩不揚名聲不

修求友不營聞達猶不能識之又況仙人亦何急令朝
茵之徒知其所云為哉

陰真君自敘

惟漢延光元年新野山之子受仙君神丹要訣道成去
世副之名山如有得者列為真人行乎去來何為俗間
不死之道要在神丹行炁導引俛俯屈伸服食草木可
得小道不能永度於世以至天仙子欲聞道此是要言
積學所致不為有神上士為之勉力加勤下愚大笑以

為不然能知神丹久視長存

吳猛真人傳

吳猛字世雲豫章人也性至孝小兒時在父母膝下無驕慢色後得道海昏上僚路有大蛇時或斷道以炁吸吞行人行旅為絕猛與弟子往除蛇害蛇乃入藏深穴猛勅南昌社公追蛇蛇頭高數丈猛踏蛇尾沿背而以足按頭弟子斫殺之猛云此蛇是蜀精蛇死則杜穀滅矣果如言將軍王敦迎猛道過宮亭廟神具官僚迎猛

猛曰汝神王已盡不宜久居非據我不相問也神乃去至蜀見敦時多疫病猛標浦水百步飲者皆愈日中請水者將千人敦惡之於座收猛奄然失去大相檢覆猛恐坐者多乃徐步於萬人之中還船天地冥合乘風迅逝一宿至家弟子見兩龍負船眼如甕大猛云敦踐人君之位命終此稔其年敦死後太尉庾亮迎猛至武昌便歸自言算盡未至家五十里亡殯後疑化弟子開棺不見其尸

許遜真人傳

許遜字敬之南昌人也少以射獵為業一旦入山射鹿
鹿胎從弩箭瘡中出墮地鹿母舐其子未竟而死遜愴
然感悟折弩而歸聞豫章有孝道之士吳猛學道能通
靈達聖歎我緣薄未得識之於是旦夕遙禮拜猛久而
彌勤已鑒其心猛升仙去時語其子云吾去後東南方
有人姓許名遜應來弔汝汝當重看之可以真符授也
至時遜果來弔其子以父命將真符傳遜奉修真感有

愈於猛

許邁真人傳

許邁字叔元小名映丹陽句容人也世為胄族冠冕相承映總角好道潛志幽契曾從郭璞筮卦遇大壯之大上有上六爻發璞謂映曰君元吉自天宜學輕舉之道初師鮑靚受中部之法及三皇天文一旦辭家往而不返東入臨安縣山中散髮去累改名遠遊服術黃精漸得其益注心希微日夜無間數年之中密感玄虛太元真

人定錄茅君降授上法遂善於胎息內觀步斗隱逸每
一感通將超越雲漢後移臨海赤山遇王世龍趙道玄
傅太初映因師世龍受解束反行之道服玉液朝腦精
三年之中面有童顏靈應得道三官都禁遣典柄侯周
魴主非使者嚴白虎出丹簡罪簿各執一通誥映諸愆
如其無答便當執也賴得龔幼節李開林相助映甚怖
懼強長嘯叱咤而答曰大道無親惟善是與天地無私
隨德乃矜是以阪泉流血無違龍髯之舉三苗丹野涿

鹿絳草豈妨大聖靈化高通上達耶吾七世祖許子阿者積仁蘊德陰加鳥獸遇凶荒疫癘之年百遺一口子阿散財拯救自營方藥已死之命懸於子阿手得濟者四百八人德墜我等應得仙者五人皆錄字青宮豈是爾輩所可豫乎言畢會司命君遣中候李遵握鈴而至魴等笑而走即得度名東宮為地仙中品映第五弟謚小名穆官至護軍長史散騎侍郎年七十二捨世尋仙能通靈降真先經患滿腹中結塞小便不利遇西王母

第二十七女號曰紫微夫人謂穆曰此病冢訟之所致家又有怨鬼為害可服术自得豁然除去紫微夫人因作服术敘以傳穆依方修合服十旬都愈眼明耳聰容貌日少司命君授以飛步之道告穆曰淵竒體道解幽達精虛中受物柔德順貞寬慈博採聞道必行逍遙飛步啟誠坦平策龍上超浮煙三清實真仙之師友乃長里之先生必當封牧鍾邑守伯仙京傳佐上德列書絳名穆第二子虎牙耀穎玄根列景真圖諸天仙入咸謂

為寅獸白齒定錄君所告服藥事多隱語誌諸姓名曰
鳳棲喬木素衣炳然履順思貞凝心虛玄五公石腴彼
體所便急宜服之可以少顏三八合明次行玄真解駕
偃息可識洞篇瓊刀應數適心高元棲隱默沈正炁不
衰木散除疾是汝所宜次服飣飯兼穀勿違益髓除患
肌膚充肥然後登山詠洞講微寅獸白齒爾能見機遂
得不死過度壬辰偃息盛木玩報周書太極殖簡金書
西華學服可否自應靈符理契同歸神洞相求穆第三

子玉斧含真淵嶷少有徽譽司徒辟掾不就隱居茅山
師楊羲受三天正法曲素鳳文後定錄君授其上道告
玉斧曰斧欲學道當如穿井井形愈深土愈難運出若
不堅其心正其行豈得見泉源耶又曰夫學道當專注
精無散念撥奢侈保沖泊寂焉如密有所覩熙焉若潛
有所得始得道之門也猶未入道之室也所謂知道為
易學道為難者也若乃幽寂沈味保和天真耽正六府
無視無聽此乃道之易也即是不能為之者所以為難

矣許侯研之哉斧子瑩之哉年二十八超然登仙映於
東山與穆書曰吾自寄神烝收景東林沐浴明丘乖我
同生每東瞻滄流歎逝之迅西盼雲崖哀興內發髣髴
故鄉鬱何壘壘將欲返身歸塗但矯足自抑爾於是靜
心一思逸憑靈虛登巖崎嶇引領仰玄真志飛上遊空
竦真始覺形非我質遂忘軀逐神矣浪心颯外世務永
絕足樂幽林外難一塞建志不倦精誠無廢遂遇明師
見授竒術請講新妙玉音洞密吐納平顏鍊形保骨沖

炁夷泯無復內外也但恨吾遭良師之太晚返滯性之
不早吾得道之狀艱辛情事定錄真君以當說之矣崇
賴成覆救濟之功天地不能踰也聞弟遠造上法偶真
重幽心觀靈無炁陶太素登七關之巍峩味三辰以積
遷虛落霄表映朗九玄此道高妙非吾徒所聞也亦由
下挺稟淺末由望也然高行者常戒在危殆得趣者常
險乎將失禍福之萌於斯而用道親於勤神歸精感丹
心待真招之須臾若念慮百端協以營道雖騁百年亦

無冀也三官急難吾昔聞之在前七考之福既已播之於後因運乘易不亦速耶幾成而敗自己而作試校千端因邪而生矣爾想善功苦心勞形勤立功德萬物芸芸亦何益哉芥子蕭蕭其可羨也各不自悟當造此事芥獨何人享其高乎師友之結得失所宗託景希真在於此舉也吾方棲神空岫廕形深林採汧谷之幽芝掇丹草以成真矣昔約道成當還覬信雖未通徹粗有髣髴亦欲暫偃洞野看望墳塋不期而往冀暫見弟因緣

簡略臨書增懷映報

楊羲真人傳

楊羲者不知何許人也仕晉簡文帝為舍人朝隱唯要人莫能識少好道服食精思遂能進靈接真屢降玄人茅君定籙安九華等授其道要西城王君又教服日月之精及思泥丸絳宮鍊魂制鬼滅三尸之法玄清真人謂羲曰夫為道當如射箭箭直往不顧乃造壩的操志入山惟往勿疑乃獲至真羲恭受勤行得仙簡文後師

義得道

鮑靚真人傳

鮑靚字太元陳留人也少有密鑒洞於幽元深心冥肆人莫之知按洞天記云靚及妹並是先身七世祖李湛張慮者俱杜陵北鄉人同在渭橋為客舍居積行陰德好道希生故福建於靚等使易世變鍊改氏更生合為天倫根胄雖異德蔭並同靚學明經術緯候師左元放受中部法及三皇五嶽劾召之要行之神驗能使鬼

神封山制魔晉太興元年靚暫往江東於蔣山北道見
一人年可十六七許好顏色俱行數里其人徐徐動足
靚奔馬不及已漸而遠因問曰相觀行步必有道者其
人曰吾仙人陰長生也太上使到赤城君有心故得見
我爾靚即下馬拜問寒溫未及有所陳陰君曰此地復
十年當交兵流血計至蘇峻亂足十年也君慕道久矣
吾相見當得度爾仙法考得仙者尸解為妙上尸解用
刀下尸解用竹木皆以神丹染筆書太上太玄陰生符

於刀刃左右須臾便滅所書者而自死於牀上矣其真
身遁去勿復還家人謂刀是其人也用竹木如刀之
法陰君乃傳覲此道又與覲論晉室修短之期皆演一
為十廣十為百以表元帝託云推步所知不言見陰君
所說是陰君戒其然矣

雲笈七籤卷一百六

欽定四庫全書

雲笈七籤卷一百七

宋 張君房 撰

傳錄

陶先生小傳

吳興謝淪撰

先生諱弘景丹陽人也幼標異操聰明多識五經子史皆悉詳究善書得古今法不肯婚宦以資營未立且薄遊下位為宜都王侍讀年二十餘便稍就服食遵行道要所得符文妙法竝是真人遺跡於是業行漸進乃拂

衣止於茅山焉觀其神儀明秀盼睐有光形細長項耳間矯矯顯然異衆矣

華陽隱居先生本起錄

從子翊字木羽撰

永明十年太歲己卯謝詹事淪先從吳興還聞先生已辭世入山甚懷嗟賞於路中仍為前傳雖未能究洽而粗舉大綱有似王右軍作許先生傳翊從叔隱居先生諱弘景字通明丹陽人也宅在白楊巷南岡之東宋初土斷仍割秣陵縣西鄉之桐下里至今居之陶氏本冀

州平陽人帝堯陶唐之苗裔也堯治冀州平陽故因居焉漢興有陶舍為高祖右司馬子青擢位至丞相十三世祖超漢末渡江始居丹陽七世祖濬交州刺史璜之弟仕吳為鎮南將軍封句容侯食邑二千戶與孫皓俱降晉拜議郎散騎常侍尚書六世祖謨濬第三子永嘉中為東海王越司馬領屯軍隨王出許昌因敗仍復過江為大將軍王敦參軍敦為丞相轉軍諮祭酒後隨敦南下而情懼禍及乃啟分屬籍禁錮積年晚起為車騎

丞相參軍不就昇平四年卒始別葬白石山之嶺贍湖北高祖毗有理識器幹高奇以文被黜不肯遊官州郡辟命並不就後板授南安正佐亦不起元興三年卒曾祖興公多才藝巨營產殖舉郡功曹察孝廉除廣晉縣令義熙二年卒祖隆身長七尺五寸美姿狀有氣力便鞍馬善騎射好學讀書善寫兼解藥性常行拯救為務行參征南中郎軍事侍從宋孝武伐逆有功封晉安侯除正佐固辭顏峻恃寵就求宅以益佛寺弗與因辭官

見諧削爵徙廣州後被恩除南海西平縣令後監新會
郡大明五年卒於彼父諱貞寶字國重司徒建安王劉
休仁辟為侍郎遷南臺侍御史除江下孝昌相亦閑騎
射善藁隸書家貧以寫經為業一紙直價四十書體以
羊欣蕭思話法深解藥術博涉子史好文章美風儀凡
遊從與蕭思話王釗劉秉周旋多為諸貴勝所賞遇元
徽四年冬銜使虜庭通鄰國之好甚得雅稱昇平元年
還都具撰遊歷記并詩數千字及所造文章等劉秉索

看仍值石頭事亡失無復別本不得傳世建元三年於
縣亡背喪還葬舊墓母東海郝夫人諱智湛精佛法
及終有異焉先是貞寶攜家隨蕭之郢州孝建二年蕭
亡其年九月母覺有娠仍夢見一小青龍忽從身中出
直東向而昇天遂視之不見尾既覺密語比丘尼云弟
子必當生男兒應出非凡人而恐無後尼問其故以所
夢答尼云將出家又答審爾亦是所願時年二十五其
冬仍隨蕭部伍還都住東府射堂前參佐廨中以孝建

三年太歲丙申四月三十日甲戌夜半先生誕焉是年
乃閏三月明日朔旦便是夏至母即沐浴而起了無餘
患先生四五歲便好書今猶有六歲時書已方幅成就
九歲十歲讀禮記尚書周易春秋雜書等頗以屬文為
意年十一為司徒左長史王釗子吳博士十三父貽宅
席卷隨吏部尚書劉秉之淮南郡十五歸都寓憩中外
徐冑舍後仍立別宅從此不復還舊廬十七乃冠常隨
劉秉尹之丹陽郡得給帳下食出入乘廐馬秉第二男

侯少知名時為司徒祭酒侯雅好文籍與先生日夜搜尋未嘗不共味而食同車而遊侯與江數褚炫等俱為順帝四友故最以才學得名侯作宋德頌連珠七警當世稱絕侯既亡後文章皆零落先生欲為纂集竟不能得是歲昇明元年冬先生年二十二隨劉丹陽入石頭城就袁粲建事先生與韓賁糜淡同掌文檄及事敗城潰即得奔出侯及弟該為沙門以逃為人所獲建康獄死人莫敢視先生躬自收殯瘞葬查硯舊墓營理都畢

自此棄世尋山而止值宋齊之際物情未安既結劉宗
常懷憂惕父乃因紀僧真求事高帝於新亭即蒙帳內
驅使二年正月沈攸之平從還東府公仍遣使侍第五
息羣六息暘侍讀兼助公間管記事先生時年二十三
除巴陵王侍郎明年侍從高祖登極還臺住殿內除太
尉豫章王侍郎先生云革運之際頗有微勤何處不容
三兩階級遂不拜又明年隨安成王出鎮石頭次歲夏
丁孝昌府君憂上郢奉迎冬還都安厝世祖即位以振

武將軍起侍宜都王侍讀齊世侍讀任皆總知記室手
筆事選須有文才者先生於吉凶內外儀禮表章爰及
踐疏啟牒莫不絕衆數王書佐典書皆承授以為准格
諸侍讀多有慙憚頗致讒嫉先生亦任之不以介意年
二十八服闋召拜左衛殿中將軍頗鬱時望先生驚亦
不解所以即告庾道敏論諸屈滯庾為面啟武帝帝云
先帝昔親命此官卿不知耶其何辭之庾告先生先生
喟然嘆曰昔不受豫章王侍郎于今五年翻為此職驛

馬非驥騄猶欲固辭庾切言之云太元已來此官皆用名家裴松之從此轉員外郎但問人才若官何所枉君恐為爾誤我事庾于時正被委任總知諸王府事先生不獲已而拜矣年二十九清溪宮新成帝宴樂之先生拜表獻頌又有伏曼容亦上賦於是勅遣中書省舍人劉係宣旨褒贊并勅豫舊宮金石會于時上意欲刻此頌於石碑王儉沮議而止時獻賦者五人惟以先生為最將欲遷擢會母憂去職尋授振武將軍起特賜酒食

欽定四庫全書

雲笈七籤
卷一百七

六

省祿隨宜都王赴京帝欲幸武進宮先生復作頌頌成而車駕事廢不復得奏云此頌體制爽絕倍勝舊格三年還都方除奉朝請拜竟怏怏與從兄書云昔仕宦應以體中打斷必期四十左右作尚書郎出為浙東一好名縣粗得山水便投簪高邁宿昔之志謂言指掌今年三十六矣方作奉朝請此頭顱可知矣不如早去無自勞辱明年五月遂拜表解職求訖巖林青雲之志於斯始矣是歲永明十一年壬申歲也先生初隱不欲辭省

出仍脫朝服掛神虎門鹿巾徑出東亭已約語左右曰
勿令人知爾乃往與王晏語別晏云主上性至嚴治不
許人作高竒事脫致忤旨坐貽罪咎便恐違卿此志詎
可作先生嘿思良久答云余本徇志非為名若有此慮
奚為所宜於是即不詣省直上表陳誠詔賜帛十疋燭
二十錠又別勅月給上茯苓五斤白蜜二斗以供服餌
先生既遂命理舳東下衆賓並餞於征虜亭舉酒揮袂
皆云江東比來未有此事乃見今日爾於是止于句容

之句曲山先生云此山是金壇洞宮周迴百五十里名曰華陽之天有三茅司命之府故名曰茅山所以自稱華陽隱居亦猶士安之玄晏稚川之抱朴凡絳人間書疏皆以此號代名先善稽古訓詁七經大義備解而不好立義異於先儒議論惟著紙不甚口談尤好五行陰陽風角炁候太一遁甲星歷算數山川地里方國所產及醫方香藥分劑蟲鳥草木考校名類莫不該悉善隸書不類常式別作一家骨體勁媚琴棋騎射亦皆領括

常言心中恒如明鏡觸形遇物不覺有滯礙為人少憂
感無嫉競淡哀樂夷喜怒時有形於言述者云皆是欲
顯事厲物了無歡愠於胷襟先生以甲子乙丑丙寅三
年之中就興世館主東陽孫遊嶽咨稟道家符圖經法
雖相承皆是真本而經歷模寫意所未愜者於是更博
訪遠近以正之戊辰年始往茅山便得楊許手書真跡
欣然感激至庚午年又啟假東行浙越處處尋求靈異
至會稽大洪山謁居士婁慧明又到餘姚太平山謁居

士杜京產又到始寧甌山謁法師鍾義山又到始豐天台
山謁諸僧標及諸處宿舊道士並得真人遺跡十餘
卷遊歷山水二百餘日乃還爰及東陽長山吳興天目
山於潛臨海安固諸名山無不畢踐身本輕捷登陟無
艱瞻卹寒棲拯救危急救療疾恙朝夕無倦其別有陰
恩密惠人莫得知之雖借人書隨誤治定在人間製述
甚多了不存錄謹條先生所撰記世道書名目如左

學苑十帙百卷

此一書先生常云羣書外雜欲探一事不可偏檢乃鈔撰古今要用以類相從

為一百五十條名為學苑比於皇覽十倍該備近賜翊
語吾無復此暇汝可踵成之此書若畢於學問手筆家
無復他尋
孝經論語集注共一帙十二卷並自三禮

序共一卷

并自

注尚書毛詩序共一卷

左傳已有劉賓賀道養注易略

例即是易序不假復注

老子內外集注四卷

并自

三國志讚述一

卷抱朴子注二十卷世語闕字二卷

依陸文更以意造世語所闕者續

臨川康王世說二卷太公孫吳書略注二卷古今州郡

記三卷

并造西域圖一張

帝王年歷五卷

起三皇至汲冢竹書為正檢五十家書歷

異同共撰之也

員儀集三卷玉匱記三卷

說名山福地事

七曜新舊術

二卷占筮略要一卷

有十法

風雨水旱飢疫占要一卷

有十

法

算數藝術雜事一卷舉百事吉凶歷一卷本草經注

七卷肘後百一方三卷

增補葛氏

效驗施用藥方五卷

此二十四

種並世用所撰目書又作相書序述異記序如此等並存集中

登真隱訣三帙

二十四卷此一

訣皆是修行上真道經要妙祕事不以出世

真誥一失七卷

此一誥並是晉興寧中衆真降

授楊許手書遺跡顧居士已撰多有漏謬更詮次敘注之爾不出外聞

夢記一卷

此一記先生自

記所夢徵想事不以示人

合丹藥諸法式節度一卷集金丹藥白要

方一卷服雲母諸石藥消化三十六水法一卷服草木

雜藥法一卷斷穀秘方一卷靈方秘奧一卷消除三尸

諸要法一卷撰集服炁導引法一卷集人間諸却災患

法一卷

此九種所撰集道書自先生凡所撰集皆卷多細書大卷貪易提錄若大書皆得數四又有圖

象雜記甚多未得一二盡知盡見也

又作渾天象高三尺許地居中央天轉而地不動二十

八宿度數七曜行道昏明中星見伏早晚以機轉之悉

與天相會云此修道所須非但史官家用又欲因流水

作自然漏刻使十二時輪轉循環不須守視而患山澗

水易生苔垢參差不定是故未立先生形細身長七尺
二寸腰止圍二尺六寸薄皮膚露筋骨青白色長頭面
疎眉目鼻小而平直長額聳耳左耳內輪有大黑誌如
豆耳兩孔裏各有十餘大毛出外二三寸方頤禿鬚露
穎少鬚髮右肩上有紫誌如兩錢大右股內有數十
細黑子多作七星形起正方如鐵鎗脚眼中常見有異
光象左右各類未嘗言其狀聞人說小來本神儀端潔
十五已上彌為美茂每出路人多嘆羨雖冬月行常執

扇自障年二十九時於石頭城忽得病不知人事而不
服藥不飲食經七日乃豁然自差說多有所覩見事從
此容色瘦瘁言音亦跌宕闌緩遂至今不得復常音響
本清正大小稱形言詞率易無姿製行步舉動翩翩輕
利顏儀和明不嚴毅小大見之皆樂悅附而自令人畏
服門徒胥附承奉祇肅有如宮庭小來與人有隔數歲
便不與人共甌筯飲食及長遊處宿息常自然安置性
不嘲調世中戲謔一切不為為人強精羗夜行獨宿無

所疑畏一生不識魔入山以來巾褐未嘗離體

梁茅山貞白先生傳

唐李渤撰

吳荆牧陶濬七代孫名弘景字通明丹陽秣陵人也初
娠母夢日精在懷并二天人降手執香鑪覺語左右曰
當孕男子非凡人亦恐無後及生標異幼而聰識成而
博達因讀神仙傳便有乘雲馭龍之志年十七與江革
褚炫劉俱為宋昇明四友仕齊歷數王侍讀皆總記室
牋疏精麗為時所重師法及清溪宮成獻頌宣旨褒贊

兼欲刻石王儉議異乃止年二十餘服道後就興世館
孫先生諮稟經法精行道要殆通幽洞微轉奉朝請乃
拜表解職答詔優歎賜與甚厚公卿祖之征虜亭供帳
甚盛咸云自齊已來未有斯事遂入茅山又得楊許真
書遂登巖造靜自稱華陽隱居書疏亦如此代名特愛
松風庭院皆植每聞其響便欣然為樂至明帝欲迎往
蔣山懇辭得止然勅命餉賚恒為煩劇乃造三層樓先
生居其上弟子居中接賓於其下令一小豎傳度而已

潛光隱曜內修祕密深誠所詣遠屬霞人可謂感而遂通者也身長七尺八寸為性圓通謙謹心如明鏡遇物斯應少憂感無嫉競滅喜怒澹哀樂或有形於言迹者是顯事屬物深慕張良之為人率任輕虛飄飄然恒有雲間氣其所修為皆自得於心非傍識能及尤長於銓正偽謬地理厯算文不空發成即為體造渾天儀轉之與天相會其纂真誥隱訣注老子等書二百餘卷至永元二年深託向晦及梁武帝革命議國號未定先生乃

引諸識記梁是應運之符又擇郊禪日靈驗昭著勅使
入山宣旨酬謝帝既早與之遊自此之後動靜必報先
生既得祕訣以為神丹可成恒苦無藥帝皆給之又手
勅咨迓先生畫兩牛一牛散放於水草之間一牛著金
籠頭有人執繩以杖驅之帝笑曰此人無所求欲效曳
尾龜豈有可致之理時有大事無不前已奏陳時人謂
為山中宰相以大通初獻刀二一名善勝二名成勝為
佳寶梁帝金樓子云於隱士重陶貞白士大夫重周弘

正其於義理精博無窮亦一時名士也先生常作詩云
夷甫任散誕平叔坐談空不言朝陽殿化作單于宮其
時人事競談玄理不習武事侯景之難並如所言大同
二年告化時年八十五顏色不變屈伸如常屋中香氣
積日不散詔贈中散大夫謚曰貞白先生仍遣舍人監
護喪事

馬樞得道傳云
授蓬萊仙監

弟子數十人惟王遠知陸逸沖

稱上足焉

雲笈七籤卷一百七